

KERWEREDD 1991

Ehr lieve Leit un Kerwegäschd,
heit feiere mer unser schenschdes Feschd.

Ob groß, ob klee, ob alt un jung,
zu unserm Feschd sin ehr all willkumm.

Wie ehr jo siehn hat alles gut geklappt,
de Kerwestrauß is klei beim erschde mol ingeschnappt.
Vorsjohr hatte mer do demet noch Probleme,
doch fers 1. mol derfen ehr uns das net iwwelnehme.

Es Wetter is herrlich es lacht uns die Sunn
un sicher han ehr uns all Frohsinn met brung.

Mer wolle Eich all Fräd mache drum dun Eich net eiere,
sonschd vegeht uns nämlich die Luschk am feiere.

Apropo feiere - fer die Polizei e großes Lob,
bei de Meschderschaftsfeier vom FCK hanse sogar die Sperrstunn uffgehob.

Die ganze Palz war hell begeischdert,
von dem neie Deitsche Fußballmeischder.
Sogar die Oma hat mer nimmi gekennt.
die wär's liebschd met em Fähnche no Lautre getrempt.
Die Fans han am Rathaus gestann schunn etliche Stunn
un han de "Rote Deiwel" vom Betze vun weidem entgä gewunk.

Jetzt fang ich awwer a eich se berichte
von de Nerremohrer Dorfgeschichte.

Awwer vorher du ich mei Stimm noch e bisje ehle,
daß ich Eich kann nohin besser vezehle.

Die Musik spielt in de Zwischezeit fer alle Leute:

“So ein Tag so wunderschön wie heute”.

Straußbuwe: “...

Normal geheert de Reiter jo uff de Gaul,
doch do iwwe beim Kurt do war ebbes faul.

Es war Samstagmorgens so um Uhre 11 un spichelglatt,
do hat er sei Gaul – der's so met de Luft se due hat –
uff de Insel zum Auslauf gehat.

Doch wie er es Ross hat hängefeehrt,
do is unnerwegs es Unglick bassert.

Er wisse jo uff em Eis kammer net so gut laafe,
drumm is de Gaul uff alle viere geritscht bis in de Grawe.

De Kurt rast im Tempo hinnerher,
daß mer hät kenne rnenne,
er wollt bei de nächste Olympiade metrenne.

De Perdsbauer kriegt ball die Platter,
wie ne de Gaul hat gedrickt ans Gatter.

Jetzt, wie er do leit uff seine Knie,
guckt er sich um, ob ne hat niemand gesieh.

Haschdisch springt er uff un fehrt de Gaul in de Stall,
es Pferd enaus due im Winter - das werd nimmi de Fall.

Apropo glatt un ausritsche,
do kann ich eich noch e anneri Geschicht verzehle.

Doch vorher speelt die Musik dem Pferdetreiber;
“Hoppe Hoope Reiter, wenn er fällt dann schreit er”

Straußbuwe: “...

Es waren mol zwä Straußborsch,
denne wars Wedder grad worscht.

Die konnt a Gladeis net abhalle,
um uffrer Party rum se falle.

Die Feier iss ruhisch veloff,
denn wem Gladeis wurd net veel gesoff.

Als es dann zu später Stunn Zeit zum vedufte war,
verabschiedeten sich die zwä met veel trarah.

Trotz Angschd unn Bang vor dem gefährlich Wedder,
sinn se dann ganz langsam häm gebreddert.

“Weschde, was de jetzt net mache darfsch”,
sagt de änd zum anner,
“Bremse” war das Wort
unn schwupp - do warnse fort!

Met Rolle seitwärts de Hang enunner,
do stehnse uff alle viere - was e Wunner.

Zum Glick iss denne zwä nix bassert,
was wär dann Nerrenohr ohne die Wert?

Ich kann denne Zwä empfehle,
sich liewer memn Fahrrad erum se quäle,
als mem Audo fert se fahre
un dann später häm se laafe.

Die Musik speelt e Liedche zum Schluß,
denne Unglicksrawe zum Verdruß
“Jo mer san mem Radel do!”

Straußbuwe: “...

Iwwer de Woch fahre manche Kinner met em Zug,
damit se in de Schul werre ganz klug.

Mojens um 7 sinn veel noch net bei de Sach
unn leehe sich deshalb im Zug noch e bissje flach.

De Zug muß dann in Landstuhl haltmache,
damit die Kinner met ehre siwwe Sache,
aussteien kenne, um in die Schul se renne.

Doch 3 Schüler von Nerremohr bleiwe noch e bissje im Zug hocke,
weils in de Schul dut nimmi Bocke.

Als se dann grad ausstehe wolle
fangt uff emol de Zug an se rolle.

Sie wolle noch rausspringe im nu,
doch die Der - oh Schreck – die geht zu.

Dann steiense in Kindsbach uff zum rausgehe,
awwer de Zug kommt efach net zum stehe!

Plötzlich kommts ne in de Sinn,
das do muß de Schnellzug no Lautre sinn.

In Lautre akum rennense uff Gleis 8,
sonst hettense noch de ganze moje in Lautre vebracht.

In de Schul ingetroff war glei Paus,
unn no 2 Stunn war die Schul a schunn aus.

Anstatt sich im Zug noch emoL flach se lehe,
soll mer rechter owends friher ins Bett gehe.

Die Musik speelt denne Schlofkepp laut:
“Steht auf sonst ist der Tag versaut!”

Melodie: Auf der schwäbsche Eisebahne

Straußbuwe: “..

Do iwwe wohnt enner im Hodeeck,
der war beinah Junggesell geblebb.

Doch vorsjohr isser öfter ins bayrische gebrummt
un hat sich vun dort a e Mäde met gebrung.

Die zwee vestehn sich gut - es gebt manches se lache
un mache met nanner - ganz verrickte Sache.

Es war Sonntagsnomettags hinnerm Haus uff de Weide,
do grase die un zwische drin e paar Geiße.

Die ä Gäß war u'ruhig un macht so ehr Mucke
un fangt a wie närrisch se kreische un se stuppe.

Do gab's kee Zweifel, das war de Beweis.
Jetzt breichte mer, - ment de Kurte, e Bock fer unser Geiß.

Un weil er das net länger met a konnt seh,
kummt er a klei uff e tolli Idee.

Der Kerl schwingt sich uffs Moped un so fahre se se dritt,
er vorne, die Freindin hinne un die Gäß in de Mitt.

Von weitem schon konnt mer die Gäß heere kreische un towe,
so fahre se met der Gäß zum Bock - uff em häße Owe.

Met voller Fahrt ging's es Dorf e naus,
so schnell is noch kee Gäß zum Bock gesaust.

Die Musik speelt denne Mopedfahrer meck, meck:
"Ei, jei, jei, jei die Goß is weg!"

Straußbuwe: "...

In Nerremohr gebts 2 Spezialischde,
die wollte net uff e Garagedoor verzichten.

Do hannse sich ens kaaf, glei ingebau
unn das hat sofort hingehau.

Vunn inne hanse sich ihr Werk betracht
- unn weil alles hat so gut geklappt -
hannse a glei e Flasch Bier uffgemacht.

Es war schun spät, sie wollte die Garage velosse,
doch's Door ging net uff, es war efach veschlosse.

Jetzt hanse geguckt, wodra das leie kennt,
vielleicht hat jo nur die Roll geklemmt?

Sie hann alles noch mol durchgescheckt,
awwer de Fehler hat nirgens gesteckt.

Die Nerve ware ganz strabaziert,
das hat dann zum Door rausreise gefehrt.

Die Musik speelt denne 2 schlaue:
"Schaffe, schaffe, Garagedoor inbaue"

Melodie: Schaffe, schaffe Häusle baue

Straußbuwe: "...

Weil's im Sommer is ganz heiß,
schmeckt statt Kaffee besser Eis.

Desweh is e Fraa, am e scheene Nummedah,
no Ramschde in die Eisdiel gefahr.

Glei vorne dra hat se geparkt
un weil's presseert - net abgesperrt.
Dann awwer dabber in die Eisdiel enin,
de Hund loßt se im Audo drin.

In de Zeit wo se war beim Italiener,
is doch der dabbisch Keder met seiner Pot,
uff die Zentralverichelung gerot.
Schon von weitem sieht die Fraa wie ehr Dackel,
munter uff em Fahrersitz erum wackelt,
Sie ergreift die Audodeer - o Schreck,
es Kneppche war unne - es war efach weg.
Dann sucht se nom Schlüssel - doch sie findt ne net -
weil er noch im Zündschloß steckt.

Die Fraa vesucht no me Geistesblitz
met me Steckelche durch de Fenschderschlitz,
das Kneppche von de Deer eraus se ziehe,
doch vegeblich war all ehr Bemiehe.
Sie konnt dem Hund gut zu spreche un vezehle,
doch der hat gement, sei Frauche wollt nore met em speele.

Do gebt's nor noch ens - ans Telefon springe,
die misse von dehem de Ersatzschlüssel bringe.
Sie greift zum Geldbeutel o Großmahleur,
do met is wohl nix - denn der is leer.

Un das gute Eis, wo se vorhin erscht hat kaaf,
is in de Zwischezeit velaaf.

Die Musik speelt der Fraa no eierm Applaus:

“Bofrost kommt direkt ins Haus”

Musik-Melodie: Klingeling, es kommt der Eiermann

Straußbuwe: “...

Mit de Straußbuwe hann mer viel gemacht
 unn dank em Uwe a veel gelacht.
 Vorsjohr ware mer mol Zelte,
 do owwe uff em Berg in aller Kälte.

Holz unn Babier wollt de Uwe zum brenne bringe,
 doch das wollt em net so ganz gelinge.
 Das bissje flaggere hat em gar net gefall,
 plötzlich is em ebbes ingefall:

Irgendwo hat de Uwe mol gehert,
 daß Benzin es Feier zum brenne verfehrt.
 Er dut es Benzin iwwer die Glut driwwergieße
 unn schunn fange die Flamme ah se sprieße.

Außerm Holz fangt ah noch de Benzinkanister ah se brenne
 unn de Uwe sieht mer nur noch uff de Wiss rumrenne.
 Mit verkohltem Schuh un verbrenntem Bäh,
 hupst de Uwe rum -ach war das schäh.

Awwer noch schenner war,
 wie mer an de Bostalsee sin gefahr.

De Doktor hat gement,
 met schwimme is in de nächste paar Woche nix drin,
 deshalb dut de Uwe schwitze,
 während die annere met de Badehose rumflitze.

Met zwee anenonnergebunene Tretbotcher simmer uffem See rumgestrampelt,
 doch die im hinnitusche han sich ziehe geloß un sinn nur druffrum gehampelt.
 Das war denne im vorderschde a so dumm,
 do hann se sich efach los gebunn.
 Enner ruft noch: "Das kenner eich doch net gefalle losse",
 de Uwe setzt ah zum Sprung - doch der issem net ganz gelung.
 Metsamt de Klamotte unn de Schuh

iss er abgesoff im Nu.

Die Musik speelt em Uwe ganz sacht:

“Humor hat der, der trotzdem lacht.”

Straußbuwe: “...

Mittlerweile is es weit un breit bekannt,
Ramschde-Miesebach is die jingschd Stadt in unserm Land.

Daß Ramschde e Stadt werd war schon länger geplant,
doch daß es so schnell geht hat niemand geahnt.
Gebaut wurd in dem Städtche wie verickt,
nor am Schwimmbad han se sich lang e'rum gedrickt.
Wenn's endlich fertig is entsteht e Stick neie Kultur,
das städtische Schwimmbad met dem Name "Azur".

A politisch sich fer uns manches geännert hat,
mer geheere jetzt schließlich zu de Stadt.

Z.B. die Titel von de Leit an de Spitz,
die häße jetzt annerschd - das is kee Witz.
Die Stadtbermeschder beruft jetzt de Stadtrat in
un uff de Vebandsgemeie sitzt die Stadtverwaltung drin.

Unser Licht un Wasser - das dun mer am Geldbeutel merke,
krien meer jetzt von de städtische Werke.
Doch beklage eich net ehr liewe Leit,
do defor hann mer in die Stadt nimmi so weit.
In e paar feierliche Stunn das wisse ehr jo a,
wurde Ramschde-Miesebach die Stadtrechte iwwertra.

So is Nerremohr e Vorstadt werr,
doch fer uns bleibt's unser schenes Derf.

Meer hätte sogar beim Derfschänheitswettbewerb Chancee.
nor fehle uns do dezu noch geplaschderte Stroße.

Die Musik speelt nun met Rabatz:
"Jetzt fahre mer öfter in die Stadt"

Melodie: "Musi denn zum Städtele e naus"

Straußbuwe: “...

Deletschd wollte zwä vun unsere Straußbuwe unser Bermäschder beehre.
Doch die sin gar net zu Wort kumm - das werrener glei hehre.

Das die zwä net willkomme ware, konnten se schunn am Gesichtsausdruck erkenne.
Was do so alles gefall war, das will ich erst gar net alles nenne.
Uff jede Fall hat er vun seinem Arbeitsstreß vezehlt
unn sie hätte gar kee Hemmschwell - das hat die zwä ganz schee gequält.

Drei mol hannse agesetzt, um se sah was se eigentlich wollte,
doch de Bermeschder hat eifrig weiter gescholte.
Unner annerem dröhnt er ganz monoton,
fer Bagatelle gebt's jo a e Telefon.

Uff sei Sprechstunn hat er so lautstark hiegeuß,
daß die Uhr verrickt gespeelt han muß - vor Schreck!
Denn plötzlich, nennt er: "Um elf Uhr komme ehr do her?",
awwer es war erschd 8 Uhr unn kee Minut mehr!

Es war zwar schunn lang dunkel, es war nämlich im Winter,
doch wie de Bermäschder die Uhr ablest, do komme die zwä net dehinter.

Unsere Straußbuwe wollte dann es Privatlewe vum Bermäschder net weiter stehre,
awwer dodevor in die näkschd Sprechstunn inkehre.

Die Musik speelt dem gestressde Bermäschder met Humtata:
"Guten Morgen liebe Sorgen seid ihr auch schon alle da?!"

Straußbuwe: "...

Bei uns im Dorf do gebts e Bauer,
der leit em schöne Wetter uff de Lauer.

Unn isses dann soweit,
dann fährt er voller Heiterkeit
met Pony unn met Kutsch
zu de Freunde uff e Rutsch.

Es Pony bind er an e Poschde
unn geht mem Willi de Beerewei koschde.
Denn wie's so is bei alde Bekannte,
dud mer a glei e Schwätzje halte.

Die Zeit vergeht, dem Pony werds zu dumm,
es reißt sich los unn iss veschwunn.

E Mann sieht das Gespann ganz ohne Fahrer,
am Betterhauser Wald in Richtung Nerremohr trabe.

Er macht die Warnblinkanlach a,
fährt dem Pony hinnerher - unn froht sich:
"Wo is dann bloß de Kutscher vunn dem Gefährt?"

Kurz nohm Ortsschild biegt's Pony scharf rechts ab
unn reißt dodebei a noch an de Kutsch e Kotflügel ab.

Do war em Haase alles klar,
er macht halt unn geht zum Gisela.

Das werd ganz blaß unn ruft entsetzt:
"Ach Gott! Wo is de Karl bloß bleb?"

Es sterzt ans Telefon, ruft schnell beim Willi oh,
der mennt in aller Seeleruh: "Ach de Karl, der is noch do!"

"Dann richt em Karl aus: „Sei Gaul iss net doof,
der steht drauß vorm Stall In unserm Hof.“"

Die Musik speelt dem Bauer vom Ort:
“Fahr net so weit mem Pony fort...”

Melodie: Hoch auf den gelben Wagen

Straußbuwe: “...

Im letschde Herbschd is seeleruhig uff de Autobahn,
e Mann im Richtung Glan-Minchwiller gefahr.

Doch plötzlich is er uffgeschreckt,
do hat er rechts bei Nerremohr e Brand entdeckt.
Als Deitscher Bürger fühlt er sich vepflichtet,
denne Brand se melle, wo er hat gesichtet.

Fer die Kuseler Feierwehr war ganz klar,
daß Nerremohr do defor zustännig war.
Die wäre a sofort insatzbereit,
sogar daachsiwwer hann die ehr Leit.

Die Feierwehr fahrt met Ta-Tü-Tata,
die ganz Nerremohrer Gemarkung ab.
Doch vun em Feier war nix se entdecke,
sie dun nor met ehre Krach die Leit erschrecke.

Florian Niedermohr hat dann weitergemeld:
“Kein Brandherd entdeckt in Wald un Feld,
nirgends ein Feuer, net e mol e bisje warm,
möglicherweise war das ‚Blinder Alarm‘”.

Doch unser Feierwehr is ziemlich pflichtbewußt,
drum fahre se noch do hinne de Berg e nuff.
Links hinner Richtung Hohwald wollte se zum hechste Punkt,
doch unnerwegs do hat’s schon gefunkt.

Do stoßen se zum e ältere Ehepaar,
wo schon öfter in de Kerwered war.
Die han dort e Grundstick die Feierwehr halt an,
de Ehemann sitzt owwe uff em Baam.

Jetzt hat die Feierwehr a de Brandherd entdeckt,
iwwerisch war nor noch e bisje Esch.

Das Päärche hat schon erlebt manch witzige Geschichte,
doch die Feierwehr war we Ihne noch nie ausgerickt.

“Mann! Komm e runner!”, saht do sei Fraa,
“we uns war nämlich das ganze Tra-ra.”

Die Musik speelt:

“Es hat gebrennt! die Feierwehr kommt a gerennt!”

Straußbuwe: “...

Jede Mittwoch un Sonntag han mer uns im Rathaus getroffen,
han veel geknibbelt un manchmol enner gesoff.

Wenn einische von eich menne,
dass mer nur saufe kenne,

do muß ich eich verzehle,
dass mer a gut Fußball speele!

Vor kurzem han mer es erste Mol beim Dorfturnier mitgemach,
das war ganz efach a dolli Sach,

hingang sin mer, um e bissche Spsss se han,
hängeschwankt sin mer mit em Pokal in de Hand.

Die erste zwä Spiele hammer 4:0 un 1:0 gewunn,
do han unser Fans ball gespunn.

Am Sonntag hammer ge de Dorfkrug verlor,
das war iwwerhapt net schlimm,

denn am Mondach im Finale han mer se gespatzt,
weil mer jo efach die bessere sin.

Später bei de Siegerehrung hammer die Pokale in Empfang genumm
un han dann unser Liedsche gesung: (blau, blau, weiß, blau).

Vor lauter Freed han mer dann e bissche veel getankt,
un am nächste Tag war mer alle krank.

Die Musik speelt denne Fußballer vom Ort:
“Der Theodor, der Theodor , der spielt bei uns im Fußballtor”

Straußbuwe: “...

Bevor ich zum Schluß komme will ich mich ohne Schranke,
bei alle Helfer un ganz besonnerschd bei de Werkvolkkapell bedanke.

Ehr Leit dun jetzt all die Hänn aus de Säck eraus
un gewwe unsrer Musik ehr vedienter Applaus.

Ich will mich jetzt nimmi länger uff de Läder erum dricke,
ehr han jetzt bestimmt Derschd un wolle e paar Schoppe schlicke.

Fer die Getränke han unser Vereine reichlich gesorchd
un wann ehr Hunger han, krien ehr a Worschd.

Ich merk alleweil dir Glieder wernn schwer,
ach wann e mol das veele vezehie net wär.

Ich men allemol es langt fer das do Johr,
ich han fer heit a noch was anneres vor.

Anschließend dun meer noch die "Drei Erschde" danse,
do geht's rund do, krien sogar die Turnschuh Franse.

Awwer bevor mer dezu kumme, das alles se genieße,
du ich noch unser Kerwestrauß begieße.

Du sollschd es ganz Johr iwwer henke,
daß die Leit noch lang an unser Kerb serick denke!

Straußbuwe: "...

Ich sah eich noch Tschüs un Aufwiedersehn
un feiere mer blos die Kerb a recht schön.

Musik: "Auf ehr Brüder in die Palz!"